



Nunatsinni Nakorsaaneqarfik

Cannabisip nakorsaaitut atorlugu misiliutaanissaa pillugu Nunatsinni Nakorsaaneqarfiup ilitsersuusaa nr. 2/2023

Nakorsanut

21. marsi 2023

Nakorsat cannabis nakorsaasiaq atorlugu napparsimasunik nakorsaasinnaanissaat pillugu ilitsersuut

Aallaqqaasiut

16. marsi 2023 aallarnerfigalugu cannabis nakorsaaitut atorlugu ukiuni marlunni misiliisoqartussanngorpoq. Taamaalilluni nakorsaait akuerisat atorlugit nalinginnaasumik nakorsaaneq sunniuteqanngippat, nakorsap naliliineragut nappaat tunngavigalugu immikkut toqqakkat, cannabisimik nakorsaasiamik nakorsarneqarsinnaanngussapput.

Cannabisimik akullit Kalaallit Nunaanni nakorsaaitut akuerisat cannabisimillu nioqutissiat nakorsaaitut akuerineqanngitsut misiliinermi atorneqassapput. Cannabisimilli nakorsaasiat immikkorluinnaq ittuni, nakorsaait nalinginnaasut allat tamarmik misilinneqareersimappata aatsaat atorneqarsinnaassapput. Tamatuma saniatigut cannabisimik akulinnik nakorsaaneq nakorsaait akuerisaasut toqqarneqaaqqaartarnissaannik tamatigut tunngaveqassaaq. Cannabisimik akullit nakorsaaitut akuerisaasut (nunani arlaqanngitsuni), tamatuma kingorna immikkut ittuni atorneqarsinnaanngussapput – aatsaallu misilinneqareerlutik iluaqutaanngippata, immikkorluinnaq ittuni cannabisinik inuttassaannut nakorsaasiamik nakorsaq nakorsaasiinnaassaaq. Nakorsaanermi periarfissat kingullersarisaat tassaapput cannabisit nunap naasuinit sanaanik taaneqartartut, qaqutigorsuaq aatsaat nakorsaasiunneqarsinnaasussat.

Nakorsaaitut akuerisaanngitsunik nakorsaaneq matumani pineqarmat, cannabis atorlugu nakorsaanermik naliliinissamut, ilisimatuussutsikkut tunngavissaqanngilaq, misiliinerlu nakorsaaitut akuerisaasutuulli, cannabisit pitsaassusissaannut, isumannaassusissaannut sunniutaannullu tunngatillugu piunasaqaateqanngilaq. Navianaataasinnaasullu pillugit ilisimasat nakorsaatinut akuerisaasunut sanilliullugit killeqarnerupput. Taamaammat qulaani pineqartut pissutigalugit cannabisit napparsimasunut isumannaallisaaneq pillugu piunasaqaatinik eqquutitsinnaassanngillat, taamaallaallu immikkorluinnaq ittuni nakorsaasiunneqarsinnaassallutik. Nakorsaqarneq pillugu inatsit naapertorlugu nakorsaq kisimi nakorsaasiinnaatitaammat, cannabisimik nakorsaasiamik napparsimasumut aalajangersimasumut nakorsaasiinissami tamatigut nakorsaq naliliillunilu aalajangiisuussaaq.

Ilitsersuut cannabisimik nakorsaasiaq pillugu pingaarnertut pasissutissiissaaq. Tamatuma saniatigut napparsimasut ataasiakkaat taakkulu qanoq innerat tamatigut naliliivigineqartussaagaluit, napparsimasut cannabisimik nakorsaasiamik nakorsarneqarnissaat naapertuuttut naliliivigineqartut pingaarnertit nassuiarneqarput. Ilitsersuummi napparsimasunik nakorsaasiinermut, akisussaaffimmut, isumannaassutsimut nakkutilliinermullu tunngatillugu suut eqqumaffigineqarnissaasa pingaaruteqarnera nassuiarneqarportaaq.

Ilitsersuut Inatsisartut 2019-imi ukiakkut ataatsimiinnerminni cannabisimik nakorsaasiamik misiliinissamut tunngatillugu aalajangiinerannik tunngaveqarpoq.

Cannabis nakorsaasiaq

Cannabis nakorsaasiaq tassaasinnaavoq cannabis assilillugu sanaaq imal. nunap naasuaneersoq cannabis, nunatta nakorsaataasiviani napparsimasunut ataasiakkaanut nakorsap nakorsaasiunniagaa tunngavigalugu inaarutaasumik suliarineqartoq. Cannabisimik nakorsaasiat tassaasinnaapputtaaq naasup cannabisip pilutaasa ilaat imal. isserit assigiinngitsut ass. uuliatut, iisartakkatut qalerualittut imal. tiitugassatut suliarineqarsimasinnaasut.

Cannabisimik akullit aqqisuussinermut ilaasinnaanissaat sioqqullugu, Danmarkimiit inniminnerneqaqqaassapput, taamaalillutillu piumasaqaatit Danmarkimi misiliinermi aalajangersakkat eqquutsinneqassallutik. Kalaallit Nunaanni misiliineq Danmarkimi aqqisuussinermiit aallaaveqarpoq nunatsinnili pissutsinut naleqqussagaalluni.

Nakorsagassat katsorsaanissamullu toqqammaviusinnaasut

Nappaateqartut cannabisimik nakorsaasiamik nakorsarneqarnissaat naapertuuttut katsorsaanermilu toqqammaviusinnaasut, nunani allani cannabis pillugu aqqisuussinernit misilittakkanik nunanilu tamalaani ilisimatuussutsikkut ilisimasanik tunngaveqarput. Napparsimasulli cannabisimik nakorsaasiamik nakorsarneqarnissaa tamatigit nakorsamit naliliivigineqassaaq.

Tulliuttuni Kalaallit Nunaanni cannabis nakorsaasiaq atorlugu katsorsaanissamut toqqammaviusinnaasut nassuiarneqassapput. Nunatsinni Nakorsaaneqarfiup naliliinera naapertorlugu toqqammaviit taakku kisimik cannabisimik nakorsaasiamik nakorsarneqarnissamut naapertuussinnaapput.

Sianiutitigit anniarisat

Cannabis nakorsaasiaq qitiusumi siammasissumilu sianuteqarfinni anniarisanut sakkukitsumik nipaallisaataasinnaammat, sianiutitigit anniarisat cannabisimik

nakorsaasiamik nakorsarneqarnissaat naapertuussinnaasutut naliliivigineqarpoq.

Sianiutitigit anniaatinut tunngatillugu sunniutaata ilisimatuussutsikkut uppersaatitaa pitsaanerpaajuvoq, ataavartumilli anniarisanut allanut tamanut killeqarluni imal. sunniuteqanngivilluni.

Sianiutitigit anniarisat, sianiutitigit nappaatinik ajoqusernilluunniit patsiillit qitiusumik siammasissumiluunniit sianuteqarfinneresutut immikkoortinneqartarput. Anniarisat qitiusumik sianuteqarfimmeersut, qaratsap taqaagut milittoornerup aanaartoornerrulluunniit kingorna, qiteralikkut ajoqusersimasuni multibel sklerosemillu (MS) nappaatilinni takuneqarsinnaasarput. Sianuteqarfinni siammasissuni anniarisat diabetesimik nappaateqarnerup kingunerluutaasut kingusissukkat takkuttutut, sivirusimik imigassamik atornerluisimanermi, kuppiaqqat virusiannik amerluuteqarnermi, qimerluup nataqquanik anillakartoornermi/diskusprolaps, ajutoornikkut sianiutit ajoquserneranni, HIV-mik patsiseqartumik aseruuttoornerni il.il. takuneqarsinnaasarput. Kiisalu kræftimik nappaatillit sianiutitigit aseruuttoornermik patsiseqartumik anniarisaqarsinnaapput.

Multipel sklerose (MS)

Qitiusumik sianuteqarfimmeersunik anniarisallit, MS-imillu nappaatilinni anniaataasumik nukii noqarsimasut, cannabisimik nakorsaasiamik nakorsarneqarnissaat naapertuussinnaavoq. MS-imik nappaatilinni quiniarnermi ajornartorsiuteqarnermut sianiutinik patsiseqartumut sunniutaa uppersaatissaqanngilaq, nappaateqartulli sunniutaanut uuttuutit allat pillugit nalunaarutaat arlallit, ilisimatuussutsikkut akunnattumik uppersaatissaqarput.

Cannabisimik nakorsaasianik nakorsartinneq amerlasuuni kingunerluutitaqartarpoq, ataatsimulli isigalugu nakorsaaneq isumannaakannerpoq.

Sativex® Danmarkimi inersimasuni MS pissutigalugu nukii akunnattumik annertuumilluunniit noqarsimasuni, ersiutini nukii noqarsimanerannut attuumassuteqartuni noqarunnaarsaatini allanik naammattumik

iluaquserneqarsinnaasimangitsuni malunnaatilimmillu pitsaanerulersuni, nakorsaammik aallaqqaammut misiliinermi nappaatip ersiutaanik nipaallisaatitut akuerisaavoq.

Qiteralikkut ajoqusersimaneq (paraplegi)

Qiteralikkut ajoqusersimasuni qitiusumik sianiuteqarfikkut anniarisat, nukiit noqarsimasut annernarnerat, qiteralikkut ajoqusersimasuni illuttut nukillaarsimasuni nakatsukkullu ajornartorsiuteqartuni, cannabis iluaqutaasinnaarpassimat, cannabisimik nakorsaasiamik nakorsaanissaq naapertuussinnaasutut naliliivigineqarpoq.

Kemortereerluni meriangguneq meriarnerlu

Merianggunaaveersaatit akuerisat misilinneqareerpata sunniuteqanngippatalu, kemortereernermeri merianggunerup meriarnerullu cannabisimik nakorsaasiamik nakorsarneqarnissaat naapertuussinnaasutut naliliivigineqarpoq. Innersuussulli misissuinernik pisoqaanerusunik merianggunaveersaatit nutaanerusut pissarsiassaangikkallarneraneersunik tunngaveqarpoq.

Cannabisimit nakorsaasiat

Cannabisimit nakorsaasiat misiliinermi atoneqartut nakorsaanermi toqqarneqarnissaat ima tulleriiaarneqarpoq:

1. nakorsaasiat nunani arlaqanngitsuni akuerisat (cannabisimik akulik ataaseq Danmarkimi akuerisaavoq).
2. Cannabisimik nakorsaasiat nakorsaataasivimmi inunnut ataasiakkaanut nakorsaasiat
3. Nunap naasuanit cannabisimeersut nakkutigisamilli nakorsaasiat

Nakorsaatitut akuerisat

Kalaallit Nunaanni misiliinermi Sativex® aamma Epidyolex® cannabisimik nakorsaasiatut akuerisatut kisimik ilaapput.

Sativex®

Sativex® tassaavoq qarnup iluanut seqqattaat, nunap naasuata cannabisip naasortaani sianiuteqarfinnut suniutillit marluk; delta-9-tetrahydrocannabinol (THC) aamma cannabidiol (CBD) isserinik akulik. Taanna Danmarkimi nunanilu allani arlalinni inersimasunut MS -imik nappaateqarneq pissutigalugu, akunnattumik annertuumillu nukiit noqarsimaneranni ersiutinut annikillisaatitut/nipaallisaatitut akuerisaavoq. Nakorsat sianiuteqarfitsigut nappaatinik immikkut ilisimasallit kisimik Sativex®-imik nakorsaasiisinnaatitaapput.

Epidyolex®

Epidyolex® tassaavoq imertagaq CBD-mik cannabisip naasuaneersumik akulik. Taanna EU-mi noqartarnermut nappaatinut Dravet Syndrom aamma Lennox-Gastaut Syndrom nakorsaatitut akuerisaavoq. Epidyolex® taakkununga marlunnut nioqqutissiortup qinnuteqaatigisimasaanut taamaallaallu noqartarnermut nakorsaammut akuerisaasumut allamut Clobazamimut akuliullugu nakorsaanermut atatillugu atugassiatut akuersissutaavoq.

Epidyolex® nakorsanit meeqqat nappaataannik imal. sianiutitigut nappaatinik immikkut ilisimasalinnit- noqartarnermik immikkut ilisimasalinnit- taamaallaat nakorsaasiinneqarsinnaavoq.

Nakorsaatit akuerisaanngitsut tunniunneqarsinnaasut

Makku Kalaallit Nunaanni Danmarkimilu akuerineqanngillat. Taamaammat nakorsat taakku atorlugit nakorsaanit tunniussinissamut akuersissummik Nakorsaatit pillugit Ataatsimiititaliamut qinnuteqaqqaassapput.

Cesamet® (nabilone)

Taanna cannabisimik kemi atorlugu sanaamik (THC) akoqarpoq. Taanna USA-mi Tuluillu Nunaanni merianggunaveersaatit nalinginnaasut iluaqutaanngippata, kemortinnerup kingorna meriangguneremut meriartarnermullu nakorsaatitut akuerisaavoq.

Marinol® (dronabinol)

Taanna cannabisimik kemi atorlugu sanaamik (THC) akoqarpoq. Taanna USA-mi merianngunaveersaatit nalinginnaasut iluaqutaanngippata, kemortinnerup kingorna merianngunermut meriartarnermullu kiisalu AIDS-imik nappaatilinnut nererusussuseqanngitsunut annertuumillu sanigortunut nakorsaaitit akuerisaavoq.

Syndros® (dronabinol)

Imertagaq taanna cannabisimik kemi atorlugu sanaamik (THC) etanol propylen-imi glycol-imilu ittumik akoqarpoq. Taanna aamma USA-mi merianngunaveersaatit nalinginnaasut iluaqutaanngippata, kemortinnerup kingorna merianngunermut meriartarnermullu nakorsaaitit - kiisalu AIDS-imik nappaatilinnut nererusussuseqanngitsunut annertuumillu sanigortunut nakorsaaitit akuerisaavoq.

Cannabis-it inunnet ataasiakkaanut suliarineqarsimasut

Misiliinermi ilaapputtaaq cannabisit nakorsaataasivimmi inunnet ataasiakkaanut sanaat, taakku nakorsap nakorsaasiussaa tungavagalugu nakorsaasiassaq naammassineqanngitsoq aallaavigalugu sanaajupput.

Nunatta Nakorsaataasivia, ilitersuummi matumani pineqartunik, Kalaallit Nunaannut nakorsaatilik pilersuisumit qarasaasiakkut iniminniissummiit pisiniassaaq. Nakorsaq cannabisimik nakorsaasiussassamik allagarsiippat, allagarsiussap atorsinnaanera nakorsaataasiviup aallaqqaammut qulakkeeqqaassavaa. Imaappoq nakorsaatip qarasaasiakkut allagarsiunneqarsimanera allagarsiussallu inatsimmi piumasaqaatinik imaqrnera nakorsaataasiviup qulakkiissavaa.

Poortaq cannabisimik imalik napparsimasumut mianersoqqussutinik naapertuuttunik qanorlu atorneqarnissaanut paasissutissanik nalunaaqutserneqassaaq.

Massakkut marlunnik inaagassanik tassalu Dronabinol (THC) aamma Cannabidiol (CBD), nunap naasuata isseranit sanaanik peqarpoq. Naammassisani Dronabinol-imik imal. Cannabidiol-imik akulinnik imal. taakku akuleriissillugit sanasoqarsinnaavoq.

Dronabinol

Dronabinol (THC) nipaallisaataavoq, sinissaataavoq, merianngunaveersaataavoq nererusulersaataallunilu. Kingunerluutaasutut ilisimaneqartut tassaapput panertoorneq, qasoqqaneq, uissannguneq, niaqorlunneq qaqutigullu ikiarsineq. Dronabinol pinngitsuuisinnaajunnaarsitsisinnaavoq. Dronabinol-imik nakorsartinnerup nalaani biilimik ingerlatsisoqqaqusaanngilaq.

Cannabidiol

Cannabidiol nipaallisaataavoq, qasukkarsaataavoq, annilaangajunnaarsaataavoq, noqarnaveersaataavoq, aseruunaveersaataavoq sinissaataallunilu. Kingunerluutit ilisimaneqartut tassaapput panertoorneq nukillaanganerlu. Cannabidiol-imik pinngitsuuisinnaajunnaarneq siornatigut nassuiarneqarsimanngilaq. Cannabidiol-imik nakorsartinnermi biilernissaq inerteqqutaanngilaq.

Cannabisit pinngortitameersut

Cannabisimik nakorsaasiamik misiliinerup nalaani, nakorsaatilik naammassillugit suliaanngitsunik imal. inunnet ataasiakkaanut nakorsaataasivimmit sulianik nakorsaasiinissaq periarfissaavortaaq.

Nakorsaasiat tassaasinnaapput cannabisip sikkeneri panertitat, cannabisip uuliala, iisartakkat qaleruallit, iisartakkat il.il. Tamakku- ilaatigut naasup qanoq naatinneqarnissaanut qanorlu tunisassiarineqarnissaanut piumasaqaaitut aalajangersakkanik eqquutitsinissaq qulakkeerniarlugu- Danmarkimi pisiarineqassapput. Tamatuma peqatigisaanik nakorsaasiat sakkortussutsimikkut annertussutsimikkullu poortaniit poortanut assigiissaagaassammata nakkutigisaassammatalu, nioqutissap sunik akoqarnera nioqutissiortup uppenarsisinnaassavaa. Nunap naasuanit cannabisimit nakorsaasiat suut piassaananerannut

paasissutissat Nakorsaatinut Aqutsisoqarfiup lægemiddelstyrelsen nittartagaani [Medicinsk cannabis \(laegemiddelstyrelsen.dk\)](http://Medicinsk.cannabis.laegemiddelstyrelsen.dk) pissarsiassaapput.

Cannabisimik nakorsaasiineq

Cannabisimut nakorsaasiamut tunngatillugu, nakorsaatit akuerisatut tuniniakkat sunniutaannut isumannaassusaannullu uppersaatit annertunerummata, cannabisimik nakorsaasiaq nakorsaasiutsinnagu nakorsaatit naapertuuttut akuerisatullu tuniniakkat, qulaani annertunerusumik nassuiarneqartut misilinneqareersimasariaqarput.

MS-imik nappaateqartunik, qiteralikkut ajoqusersimasunik imal. sianiutimikkut anniartunik nakorsaanermi cannabisimik nakorsaasiat nakorsamit sianiteqarfitsigut nappaatinik immikkut ilisimasalimmit nakorsaasiunneqartariaqarput. Kemortinnerup pilersitaanik meriannugeneq meriarnerlu pineqarpata, cannabisimik nakorsaasiaq, taamaallaat aakkut nappaatinik kræftimillu nappaatinik immikkut ilisimasalinnit, piartortunik katsorsaanermik akisussaaffilimmit imal. peqqissaavimmi qitiusumilluunniit napparsimmavimmi napparsimasup atassuteqarfiani nakorsamit, aalajangersimasumik atorfilimmit, nakorsaasiunneqartariaqarpoq. Nakorsat, tunngaviummik toqqammavissat taakku avataanni, cannabisimit nakorsaasiamik nakorsaasariaqanngillat. Toqqammaviit allat atorlugit qaqutiguinnaq nakorsaasiisoqassappat, nakorsat immikkut ilisimasallit kisimik nakorsaasiisariaqarput.

Cannabisimit nakorsaasiamik nakorsaanermut atatillugu, nalinginnaasumik nakorsaanermut misilinneqarsimasumut paasissutissanut tunngavilersuut sukumiisoq, tamatigut napparsimasoq pillugu allattugaatini allassimasassaaq. Nakorsaq annerpaamik qaammammut ataatsimut atugassanik nakorsaasiisinnaavoq.

Nakorsaanermut malittarinninnermullu akisussaaffik allamiinnani nakorsaanertut pisortaasumiippoq, imal. qitiusumik napparsimmavimmi nakorsatut pisortaasumiippoq. Taamaalilluni nakorsaanertut pisortaasoq imal. qitiusumik napparsimmavimmi nakorsatut pisortaasoq, nakorsat taarsaanneranni

napparsimasut ataasiakkaat pisariaqanngitsumik siviussusilimmik navianartorsiorteqqunagit, sunniutaa isumannaassusaalu eqqarsaatigalugit, malittarineqarnissaannut akisussaasuvoq.

Nakorsap nakorsaasiitinnani cannabisimik nakorsaasiamik nakorsartinnerup aallartinnissaa pillugu nakorsartittussaaq aalajangeeqataatissavaa. Taamaakkaluaq nakorsaq nakorsaasiisoq napparsimasumik peqataatitsilluni cannabisimik nakorsaasiap nakorsaanermi atorneqartariaqarneranik tamatigut aalajangiisuussaaq.

Cannabisimut nakorsaasiussamut allagarsiussaq paasissutissanik makkunannga imaqassaaq:

- Cannabisip nakorsaasiap aqqa.
- Cannabisip nakorsaasiussap sakkortussusaa poortallu imartussusaa.
- Cannabisimik nakorsaaserneqartup aqqa, najugaa inuttullu normua.
- Ulloq nakorsaasiivik.
- Nakorsaasiisup aqqa, atorfia, nakorsatut sulisinnaatitaanermut uppersaataa, najugaa oqarasuaataatalu normua.
- Nakorsaasiunneqarneranut toqqammaviusut pillugit paasissutissat.
- Annertussusiliussat qanorlu atorneqarnissaa. Annertussusiliussani pinerit tamaasa nakorsaasiussassap annertussusissaa qasseriarnissaallu (ullormut, ulloq unnuarlu, sap. ak. ulluisa arlaannut, qaammammut) allassimassapput.
- Annerpaamik qaammammut atugassanik nakorsaasiisoqartarsinnaavoq.
- Nakorsaasiussanut allagarsiussaq qaammat ataaseq sinnernagu atorneqarsinnaassaaq.

Annertussusiliineq qanorlu atorneqarnissaa

Annertussusiliinermi atuinissamilu nakorsaasiap sorpiaanera iisassatut imal. nakorsaammut najuussuut atorlugu najuussugassatut naatsorsuussaansoq apeqqutaassaaq. Cannabisimik pujortarnissaq- puaat

anersaartuutillu allat sunnerneqarsinnaaner at pissutaalluni -innersuussutaanngilaq. Cannabis nakorsaasiaq ass. tiiliarineqassappat, puuani ilitsersuutitaqassaaq.

Annertussusiliinissaq qanorlu atuinissaq pillugit paasissutissat nakorsap cannabisimik nakorsaasiamik nakorsaasiinermini allassavai. Aallaqqaammut annikitsumik annertussusiliinissaq tunngaviumik innersuussutaavoq.

Sunniutaa nakorsaatinullu allanut suniutaat

Cannabisimik nakorsaasiami nakorsaaitut sunniutillit marluk tassaapput delta -9-tetrahydrocannabinol (THC) aamma cannabidiol (CBD). THC cannabisip nakorsaaitut sunniutaasa amerlanersaannut akisussaasuuvuq. Aangajaarnartuunerup saniatigut THC sianiuteqarfiit imminnut aquttut aqutigalugit uummammut aallu ingerlaaneranut sunniuteqarpoq.

Cannabis nakorsaasiaq najuussorneqarsinnaavoq iineqarsinnaalluniluunniit. Najuussineq iisinermiit sukkanerusumik sivikinnerusumilli sunniuttarpoq. THC iineqartoq tamakkusalluni timimut akuliuttarpoq.

THC aamma CBD tinguup enzyimiinit arrortinneqartarpoq. Nakorsaaitit enzymit sunniutaannik annikillisisartut arlaat soorlu Itraconazol, Ritonavir, Clarithromycin, Amiodaron Fluconazol-iluunniit saniatigut atorneqarpat, THC aamma CBD sakkortusissapput, taamaalillutillu kingunerluutaasut annertusissallutik. Akerlianik enzymit sunniutaannik annertusititsisartut ilaat soorlu Rifampicin, Carbamazepin, Phenytoin, Phenobarbital kiisalu naasoq prikblad et perikon, THC-ip aamma CBD-ip sunniutaannik annikillisisissapput.

Taamaammat enzyminut sunniisunik saniatigut nakorsaatilinni annertussutisimik nalimmassaanissaq pisariaqarsinnaavoq.

THC aap akuinut proteininut sakkortuumik atassuteqarmat, nakorsaatinut taamaaqataannut-soorlu Warfarin, Ciclosporin-A, Amphotericin-B sunniivigeqatigiissinnaaneq navianaateqarluni.

Sinissaatinik imal. allanik ikiarsinartunik (pingaartumik morfininik) saniatigut nakorsaatilinni mianersuuttariaqarpoq. Cannabis nakorsaasiaq imigassarlu timip aalatinnerinik ataqatigiissarisinnaassutsimut-, ukkassisinnaassutsimut qisuariarsinnaassutsimullu sunniuteqartumik sunneeqatigiissinnaapputaaq.

Kingunerluutit

Cannabisimik atuneq kingunerluuterpaalunnik nassataqarpoq. Cannabisilli nakorsaasiap kingunerluutitaasa suunerat qanorlu akulikitsiginerat kiisalu annertussusiliinerup kingunerluutillu ataqatigiinnerat ilisimatuussutsikkut uppersarsineqanngilaq. Nakorsaaitut akuerisatuulli, nakorsaait pillugu paasissutissanik naalisakkanik soqanngilaq, puuinullu ikisamik nakorsaait pillugu paasissutissaqarani.

Ataani kingunerluutit, nakorsaasiat cannabisimik akullit pillugit paasissutissanit ilisimasamik kiisalu nalinginnaasumik cannabisimik atuinermiit kingunerluutit pillugit ilisimasamik tunngaveqarput.

Cannabis nakorsaasiaq makkunangga kingunerluuteqarsinnaavoq:

- Panertoorneq, isit aappillernerat
- Qasoqqaneq/sorusussuseqannginneq, uissannguneq, puiguttoorneq, uppeqqaaneq, malussaripallannginneq, ukkassilluarsinnaannginneq, oqalunniarnerup akornuteqarnera, mamassutsinik malussarsinnaassutsip akornuteqarnera, ilaguutiinnarneq, puigutuneq poqiillinerlu.
- Psykosimik nikallunganermillu nappaateqalersinnaanerup annertusinera
- Ikiarsineq paatsiveerusimanerlu. Qaqutigoornerusumik takorruineq/tusaasuusineq, malussarsinnaassutsip akornuteqalerneru, piviusunik piviuunngitsunillu immikkoortitsisinnaannginneq, takorruineq/tusaasuusineq imminullu toqunnissamik eqqarsarneq

- Uummatip akulikitsumik tillilnera allatigulluunniit tillernerata akuttoqatigiikkunnaarnera
- Aap taqqanut naqitsinerata qaffanera apparneraluunniit uissanngunermik iluaallernermilluunniit nassataqarsinnaasoq. Ilisimajunnaavinneq qaqtigoorpoq.
- Sivisuumik atuinermi pinngitsuuisinnaajunnaarneq.

Annertuallaamik atuineq

Cannabisimik nakorsaasiamik sippuineq pillugu paasissutissat annikitsuinnaapput.

Annikitsumik sippuisimanermi ersiutit tassaasinnaapput sorusussuseqannginneq, ikiarsineq, malussarsinnaassutsip sakkortusisimaneratut misigineq, uummatip tillerulunnera, isit aappalunnerat panertoornelru.

Sippuingaatsiarnermi qitiusumik sianiuteqarfiit annertunerusumik sunnerneqarnerisigut, misigissutsip timimillu atuinerup sunnerneqarnerat; takorruuineq/tusaasuusineq, piviusunik piviuunngitsunillu immikkoortitsisinnaannginneq, aap taqqatigut ingerlaarnerata sunnerneqarnera uissanngunermik, tillerit akulikillinerannik, uummatip tillernerata akuttutsinneranik imal. aap taqqanut naqitsinerata apparneranik nassataqartoq takuneqarsinnaasarpooq. Quussap katersuutiinnalernerata inalukkallu sulilluarunnaarnerat nassuarnegartut ilagaattaaq.

Sippuinermi nakorsaaneq ersiutinik ikorfartuinermillu aallaaveqarpoq.

Atorneqarfissarinngisai, immikkut mianersuussassat

Maannamut nuna tamakkerlugu imal. nunani tamalaani napparsimasunik cannabisimik nakorsaasiamik nakorsarneqartunik nakkutilliinermik nassuiaasunik maleruagassaqaqanngilaq.

Atorneqarfissarinngisat, nakorsaadini akuerisaasuni cannabisip akuinik akulinni atuuttut, cannabisimik nakorsaasiamik

katsorsarneqarnissaat isumaliutigineqartuni atuupputaaq.

Cannabis nakorsaasiaq napparsimasunut ukununga atorneqartariaqaqanngilaq:

- Akuinik sapigallit
- Tingui tartuulu annertuumik ajoqutillit
- Skizofrenimik nappaateqartut imal. ilaqutariinni taama nappaateqartortallit
- Navianaatilinnik allanik psykosertut, nikallungasut imal. imminut toqoriarsimasut
- Uummatikkut taqqatigullu peruluutaanernik nappaatillit
- Pinngitsuuisinnaajunnaarsinnaaneq pissutigalugu, imigassamik ikiaroonartumilluunniit ajornartorsiutillit ajornartorsiuteqarsimasulluunniit
- Sinissaatinik imal. aanngajaarnartunik qaratsamut sunniutilinnik allanik saniatigut atuisut (sakkortusaasinnaanerata imal. sunniivigeqatigiissinnaanerata pissutigalugu)
- Meeqqat 18-iliisimanngitsut (kingusissukkut - ilaatigut avatangiisinik paasinnissinnaanerup ineriartorneranut sunniutaasa ilisimaneqannginnerata pissutigalugu)
- Naartusut milutitsisulluunniit (cannabis naartumut/meeqqamut ingerlateqqinneqartarmat)

Immikkut mianersoqqussutit tamatumunngalu atatillugu maleruagassat

Immikkut mianersoqqussutit tamatumunngalu atatillugu maleruagassat nakorsaatinut akuerisanut atuuttut, cannabisimik nakorsaasiamik atuinalersaarnermi atuupputaaq. Nakorsap tamatumunga atatillugu nakorsaaneq napparsimasullu ulluinnarni inuuneranut kingunerisinnaasai pillugit napparsimasooq sukumiisumik paasissutississavaa.

Makku eqqumaffigisariaqarput:

- Biilimik motoorilinnillu allanik ingerlatsinissamut killilersuutit
- psykosilersinnaaneq, nikallunganermik nappaateqalersinnaaneq imminullu toqussinnaaneq pissutigalugit napparsimasumik nakkutilleeqqissaaneq
- tarnikkut napparsimalersimanermit annertuumik ersiuteqalerpat, cannabisimik nakorsaasiamik nakorsaaneq ingerlaannaq unitsittariaqarpoq, napparsimasorlu ersiutaarunnissaata tungaanut nakkutigeqqissaagassaalluni
- pingaartumik utoqqarni uissannguneg aallu taqqanut naqitsinerata apparnera pissutaallutik ajutoorluni nakkarsinnaanerup annertusinera.
- Napparsimasoq cannabisimik nakorsaasiamik atuinermi, imigassartornikkut qitiusumik sianiuteqarfimmut sunniinerup sakkortusisinnaanera pillugu mianersoqquneqassaaq
- Cannabisip tupatut pujornarneqarnissaa nalinginnaasumik immikkulli astmamik KOL-imillu nappaateqartuni innersuussutaanngilaq
- Cannabis nakorsaasiaq nassataralugu nunanut allanut angalanissamut killilliisoqarsimasinnaanerani napparsimasoq siunnersorneqassaaq. Taamaammatt cannabisip nakorsaasiap nammineq atugassap angalanermi nassarnissaanut maleruagassat suut atuunnersut napparsimasup misissortariaqarpai.

Nakorsap nakorsaasiinerisa napparsimasunut isumannaallisaanermit navianaateqarnerat- ass. naapertuuttumik toqqammaveqarani nakorsaasiisimaneq tunngavissalimmik pasitsaanneqarpat, nakkutilliinermit atatillugu nakorsanut ataasiakkaanut tunngatillugu Nunatsinni Nakorsaaneqarfik suliassanngortitsisinnaavoq.

Paasissutissinneqareernikkut akuersineq nalunaarutiginninnissamullu immikkut pisussaaffeqarneq

Nakorsaaneq sunaluunniit, napparsimasoq nakorsamit sukumiisumik paasissutissinneqareerpat akuersiteqqaarnagu aallartinneqassanngilaq nanginneqassananiluunniit. Nakorsaanerup kingunerluuteqarsinnaanera annertuumik aarlerinaateqarpat, paasissutissiineq annertunerussaaq.

Nakorsaanerup sunniutaa kingunerluutillu ilisimatuussutsikkut tamakkiisumik uppersaatissartaqanngimmata, cannabisimik nakorsaasiamik nakorsaasiinermi nalunaarutiginninnissamut paasissutisseereernermit napparsimasup akuersinerata allattugaatinut nalunaarnissaannut, nakorsaq immikkut pisussaaffeqarpoq.

Atuutilerfia

Ilitsersuut atuutilerpoq 16. marsi 2023, 2025-imilu 16. marsi ilanngullugu atuutissalluni.

Nunatsinni Nakorsaaneqarfik, 16. marsi 2023

Henrik L. Hansen / Louise L. Faber